

王  
無  
功  
文  
集

王無功文集序

大唐太常丞呂才序

君諱績字無功太原祁人也高祖晉陽穆公自南歸北  
始家河汾焉厯宋魏迄于周隋六代冠冕皆厯國子博  
士終於卿牧守宰國史家謀詳焉君幼岐嶷有奇思八  
歲讀春秋左氏日誦十紙初君祖安康獻公周建德中  
從武帝征鄴為前驅大揔管時諸將既勝並虜獲珍物  
獻公絲毫不顧車載圖書而已故家富墳籍學者多依  
焉其性特好學博聞強記與李播陳永呂才為莫逆交  
陰陽厯數之術無不洞曉年十五遊於長安謁越公楊  
素于時賓客滿席素覽刺引入待之甚倨君曰績聞周  
公接賢吐食握髮明公若欲保崇榮貴不宜倨見天下

之士時宋公賀若弼在座弼早與君長兄侍御史度相善至是起曰王郎是王度御史弟也正看今日精神足見賢兄有弟因提手引坐顧謂越公曰此足方孔融揚公亦不減李司隸素改容禮之因與談文章遂及時務君瞻對閑雅辯論精新一座愕然目為神仙童子初君第三兄徵君通嘗以仁壽三年因上十二策大為文帝所知賞素時亦欽其識用至是謂君曰賢兄十二策雖天下不施行誠是國家長筭君曰知而不用誰之過歟素有慙色河東薛道衡曾見其登龍門憶禹賦曰今之庾信也因以其所製平陳頌示之一遍便暗誦道衡大驚曰此王仲宣也由是弱冠藉甚群公之間大業末應孝悌廉潔舉射策高第除祕書正字性簡教飲酒至數

斗不醉常云恨不逢劉伶與閉戶轟飲因著醉鄉記及  
五斗先生傳以類酒德頌君雅善鼓琴加減舊弄作山  
水操為知音者所賞高情勝氣獨步當時及為正字端  
簪理笏非其好也以疾罷乞署外職除揚州六合縣丞  
君篤於酒德頗妨職務時天下將亂藩部法嚴屢被勘  
劾君歎曰網羅高懸去將安所遂出受俸錢積於縣門  
外託以風疾輕舟夜遁隋季版蕩客遊河北時竇建德  
始稱夏王其下中書侍郎凌歆學行之士也與君有舊  
君依之數月歆知君妙於歷象訪以當時休咎君曰人  
事觀之足可不俟終日何遽問此歆曰王生要當贈我  
一言君曰以星道推之閔中福地也歆曰我亦為然君  
遂去還龍門建德敗後君入長安見歆曰曩時之言何

其神驗也。君既妙占筭，兼長射覆。嘗過僕射裴寂，覆鸚鵡鳥，請君筮之。君布卦訖，曰：「剪落毛羽，羈滯樊籠，欲飛不舉，能鳴有言。」此必鸚鵡也。一座驚喜。又覆一寶釵，又筮之，曰：「一身二足，玉鍔金纏，上扶雲髮，下雜花鈿。」此寶釵也。其筮術之妙，率皆此類。才嘗奇君多識，以為非積學所致。君曰：「我學之精者，爾非不學也。後才於岐州陳倉山行，忽見著一鰲，非常端實。下馬數之，得四十九莖。因掘之，不過一尺，便得一龜。徑可尺餘，割之，將獻。遇君於長安，因以示君。曰：「此龜是九江所出，先生以為何如？」君撫龜歎曰：「此龜十境位六班，炯徹千里，徑如墨，四緣張如花，扣之若鍾磬。」是必陳倉著下皂龜也。卿讀龜書，不遍，爾才遂謝服。及才將著陰陽文書，謂才於此最後。

然終須十二年乃卒如君言君又與河南董恒河東  
薛叔友善二人並早卒君追惜不已後為思友文及二  
人誄詞甚感至君舅河東裴晞覽而歎曰不圖文誄之  
至於斯也莊周讀此亦當酸鼻武德中詔徵以前楊州  
六合縣丞待詔門下省官例日給良醞酒三升君第七  
弟靜時為武皇干牛謂君曰待詔可樂否曰待詔俸殊  
為蕭瑟但良醞三升差可戀爾待詔江國公君之故人  
也聞之曰三升良醞未足以絆王先生也特判日給王  
待詔一斗時人號為斗酒學士貞觀初以疾罷歸欲定  
長往之計而困於家病中賀起選時大樂有府史焦革家善  
釀酒冠絕當時君苦求為太樂丞丞選司以非職不授君  
再三請曰此中有深意且士庶清濁天下所知不聞莊

周羞居漆園老聃在柱下也卒授之數月而焦革死  
革妻袁氏猶時時送酒歲餘袁氏又死君歎曰天不令  
飽美酒遂桂冠歸由是太樂丞為清流君後追述焦革  
酒法為酒經一卷術甚精悉兼採杜康儀狄已來為酒  
人為酒譜一卷太史令李淳風見而悅之曰王生可為  
酒家之南董君歷職皆以好酒不終鄉人或咤之君自  
著無心子以喻志君河中先有渚田十數頃頗稱良沃  
鄰渚又有隱士仲長子光服食養性君重其貞潔願與  
相近遂結廬河渚縱意琴酒慶弔禮絕十有餘年河渚  
東南隅有連砂盤石地頗顯敞君於其所為杜康立廟  
歲時致祭以焦革配饗焉貞觀中京兆杜松之清河崔  
公善繼為本州刺史皆請與君相見君曰柰何悉欲坐

召巖君平耶竟不見崔杜高君調趣卒不敢屈歲時贈  
以美酒鹿脯詩書往來不絕君又嘗葛巾驅牛躬耕東  
臯每著書自稱東臯子晚年醉飲無節鄉人或諫止之  
則笑曰汝輩不解理正當然或乘牛駕驢出入郊郭止  
宿酒店動經數日往往題壁作詩好事者尋錄諷詠並  
傳於代初武德中有賀德仁為蒲州治中弟襄隨德仁  
任因遊龍門歲餘襄文學見貴於時而亦溺於酒德自  
方陶潛故叟龍門人至今傳之故號君為小賀襄君聞  
之笑曰我得方賀襄是不減陶元亮故倫許復何所恨  
貞觀十八年終于家詩若干臨終自剋死曰遺命薄塋  
兼預自作墓誌君常乘壹紫驢養二白犬及君終後驢  
鳴犬吠有若悲號數日皆死鄉閭以為非常君所著詩



賦雜文三十餘卷多並散逸鳩訪未畢且編成五卷君  
又著隋書五十卷未就君第四兄太原縣令凝續成之  
君又著會心高士傳五卷并酒經酒譜二卷及注老子  
並別成一家不列於集云兩

王無功文集序終

王無功文集標目

王績字無功

第一卷

賦

遊北山賦

元正賦

三月三日賦

鷺賦

河渚賦

獨居賦

孤松賦

登龍門憶禹賦

酒賦

第二卷

詩

靈龜四首

郊園

被徵謝病五首

春日山莊言志

東溪中口號

獨坐

題黃頰山壁

詠懷

山夜

山中別李處士播

初春

遊山贈仲長先生子光

春晚園林

贈薛學士方士

春莊走筆

泛舟河上

薛記室見尋

率題古意以寄

題酒店壁

醉後口號

過程處士

劇題卜鋪壁

贈程處士

嘗春酒

解六合承還

獨酌

秋夜喜遇姚處士義山

山  
中獨坐、

題畫幃背

山夜調琴、

田家、

看釀酒、

贈學仙者、

春園興夜後

堦前石竹

春且真疏

贈梁公、

山園

春日還莊

尋苗道士山居

端坐詠思

山中採藥

晚秋夜坐

野望、

在邊三首

贈崔使君善為、

崔使君善為荅

冬夜載酒

崔荅

讀真隱傳

性不好治產興後言懷

山家夏日九首

洛水南看漢王馬射

第三卷

詩

駕過觀獵

山中獨坐自贈

自答

過鄭處士山莊二首

病後酬宅

初春

題山觀壁

過鄉學

春莊酒後

題酒店樓壁絕句八首

食後

採藥

山中避暑

春桂問答

圍碁

詠隱

贈李徵士夫壽

春夜飲酒醉自問答二首

晚年叙志

示崔處士

盧新年平宅賦

別鄉中故人

獨坐

同蔡君知詠雲

贈山居黃道士

新園且坐

未昏山中叙志

閱家書

古意六首

九月九日

登墉坂二首

辛苦

詠秋蓬示辛學士

在京思故國

遊山寺

觀石壁諸龕

久客齊府病歸言志

裴僕射宅詠妓

秋園夜坐

第四卷

書

荅杜之松書、

杜使君荅書

重荅杜使君書

荅處士馮子華書、

荅程道士書、

與江公重借隨紀書

江公荅書

第五卷

雜著

無心子傳、

負苓者傳、

仲長先生傳、

五斗先生傳、

醉鄉記、

自作墓誌文

祭許廟文、

祭閔黼達文、

登龍門祭禹文

祭處士仲長子先文

荆軻刺秦王

項羽死烏江

陳平分社肉

張良遇黃石公

禹接蒼水使者

伊尹負鼎見湯

太公釣渭濱

子推抱樹死

蚺銜珠報隋侯

君平賣卜

嵇康坐鍛

藺相如奪秦王璧

梁鴻孟光

霍光受武帝顧命

老萊養親

甯戚扣牛角歌

韓康賣藥

朱雲折檻

伯牙彈琴對鍾子期



王無功文集目終

王無功文集卷第一

賦

遊北山賦

元正賦

三月三日賦

鷺賦

河渚賦

獨居賦

孤松賦

登龍門憶禹賦

酒賦

遊北山賦并序

余周人也。家于祁。永嘉之際。扈遷江左。地實儒素。人多高烈。穆公銜建元之耻。歸于洛陽。同州悲永安之事。退居河曲。始則晉陽之開國。終乃安康之受田。墳壠寓居。條焉五葉。桑榆成列。俄將百年。績南山。故情老而弥篤。東陂餘業。悠哉自寧。酒甌多於步兵。黍田廣於彭澤。皇甫謐之心事。隴畝終焉。仲長統之規模園林。幸足獨居。南渚時遊。北山聊度。日以為娛。忽經年而忘返。西窮馬谷。北達牛溪。丘壑依然。風煙滿目。孫登默坐對嵇阮。而無言。王霸幽居與妻孥而共去。窻臨水石。砌遶松篁。歌田園之去來。亦已久矣。望山林之故道。何其悠哉。詩者志之所之。賦者詩之流也。式抽短思。而賦焉。

天道悠悠。人生若浮。古來賢聖。皆成去留。八眉四乳。龍

顏鳳頭殷憂一代零落千秋整時南面相將北遊玉殿  
金輿之大業郊天祭地之洪休榮深情厚樂不供愁何  
況數十年之宰相五百里之公侯兢兢業業長思長憂  
昔怪燕昭與漢武今識圖仙之有由人誰不願直是難  
求聞鼎湖而欲信恠橋山之遽脩玉臺金闕大海水之  
中流瓊林碧樹崑崙山之上頭不得輕飛如石驚終是  
徒勞乘土牛已矣哉世事自此而可見何為而惘惘弃  
卜筮而不占餘將縱心而長往任物孤遺情之直上覺  
老釋之言頗恨文宣之技癢彼事業之遭斥豈神明之  
宰掌物無往而咸彰生有資而必養嗟大道之泯沒見  
人情之委枉禮費日於千儀易勞心於萬象審機事之  
不息知澆源之浸長鳥何事而嬰羅魚何為而在網生

物詭隔精靈忽恍莊周三月而不朝瞿雲六年而遐想  
有是夫况吾之不如先達矣請息交而自逸聊習靜而  
為娛乃披林城進陟嵒區連峯雜起複障環紆歷丹危  
而尋絕徑攀翠陰而覲條塗聳飛情於霞道振逸想於  
煙樹重林合沓而齊列崩崖磊砢而桑扶覩森沉於絕  
澗視眺朗於高嶠自謂搏風颺而出埃塏邈若朝玄宮  
而謁紫都碧巖之下青溪之曲望隱隱而裁通聽微微  
而不屬眷然引領茲焉頓足步擁路而遭回視橫煙而  
斷續古藤曳紫寒苔布綠洞裏窺書嵒邊對局髣髴靈  
應依稀仙躅爐何代而銷金杯何年而溜玉石室幽蕩  
沙塲照燭松落落而風回桂蒼蒼而露溥月未側而先  
陰霞方昇而已旭喜方外之浩曠歎人間之窘束况乃

幽谷藏真傍無四鄰紫房半掩玄壇尚新逢閭風之逸  
客值蓬萊之故人忽據梧而策杖亦披裘而負薪荷衣  
薜帶藜杖葛巾出芝田而計畝入桃源而問津崑山若  
礪渤澥揚塵栽碧棹而何日種瓊瓜而幾春自然詭異  
非徒隱淪乃上元仙骨太清神手走電奔雷移空時朽  
河間之業不齊貫淮南之術無靈受呪動南箕符迴北  
斗偃佺贈藥麻姑送酒青龍就養於甲辰玄牛自拘於  
乙丑永懷世事天長地久顧瞻流俗紅顏白首儻千歲  
之可營亦何為而自輕昔時君子曾聞上征忽逢真客  
試問仙經談九華之易就叙三英之可成拭丹鑪而調  
石髓裹翠釜而出金精珠流玉結雪曜霜明咸謂刀圭  
斲進足使雲車下迎紛吾人之狹見攬群疑而拂自使

捉足而相咸安亦何為乎此物彼赤城與玄圃豈憑虛  
而構屈但水月之非真譬聲色之無佛過矣劉向吁嗟  
葛洪指期繁影依方捕風誰能離世何處逃空假使遊  
八洞之金室坐三清之玉宮長懷企羨豈非樊籠徒勞  
海上何事雲中昔蔣元翊之三逕陶淵明之五柳君平  
坐卜於市門子真躬耕於谷口或託閭閻或潛山藪咸  
遂性而同樂豈違方而列守余亦無求斯焉獨遊屬天  
下之多事遇山中之可留聊將度日忽已經秋菊花兩  
岸松聲一丘不能役心而官道故將委運而乘流伊林  
礪之虛受固樵隱之俱託逢故客於中流遇還童於絕  
壑雲峯龜甲而重聚霞壁龍鱗而結絡水出浦而淺淺  
霧含川而漠漠是欣是賞爰遊爰豫結蘿幌而迎宵敞

茅軒而待曙爾其雜枝相糾長條交茹葉動猿來花驚  
鳥去起公子之殊賞談王孫之遠慮山水幽尋風雲路  
深蘭窻左僻茵蕪邪臨石當堦而虎踞泉度牖而龍吟  
月照南浦煙生北林閱丘壑之新趣縱江湖之舊心道  
集吾室風吹我襟松花柏葉之淳耐鳳翽龍脣之素琴  
白牛溪裏崗巒四峙信茲山之奧域昔吾兄之所止許  
由避地張超成市察俗刪詩依經正史康成負笈而相  
繼安國樞衣而未已組帶青衿鏘鏘儼堦庭禮樂生徒  
祀梓山似尼丘泉凝泗水吾兄通字仲淹生於隋末守  
道不仕大業中隱於此溪續孔子六經近百餘卷門人  
第相趨成市故溪今号王化子之溪也忽焉四散于今  
二紀地猶如昨入多已矣念昔日之良遊憶當時之君



子佩蘭蔭竹誅茅蓆芷樹即環珮林成閨里姚仲由之  
正色薛莊周之言理山溪之集門人常以百數河南董  
恒南陽程元中山賈瓊河南薛收太山姚義太原溫彥  
博京兆杜淹等十餘人稱為俊穎而姚義多慷慨同儕  
方之仲由薛收以理達稱方莊周薛實妙言理也觸石  
橫肱逢流洗耳取樂經籍忘懷憂喜時挾冊而驅羊或  
投竿而釣鯉何圖一旦遯成千紀木壞山頽舟移谷徙  
北崗之上東嵒之前講堂猶在碑石宛然想聞道於中  
室憶橫經於下筵壇場草樹苑宇風煙昔文中之僻處  
諒遭時之喪亂守逸步而須時蓄奇聲而待旦旅入小  
吉明夷大難建功則鳴鳳不聞修書則獲麟為斷惜矣  
吾兄遭時不平沒身之後天下文明坐門人於廊廟瘞

夫子於佳城死而可作何時復生式瞻虛館載步前楹  
眷眷長想悠悠我情俎豆衣冠之舊地金石絲竹之餘  
聲歿而不朽知何所榮吾兄仲淹以大業十三年卒於  
卿館時年四十二門人謚為文中子及皇家受命門人  
多至公輔而文中之道未行於時余因遊此溪周覽故  
迹益傷高賢之不遇也臨故墟而掩抑指歸塗而歎息  
往往溪橫時時路塞忽登崇岫依然舊識地迴心遙山  
高視直望煙火於桑梓辯溝塍於鄉國斜連姑射之西  
正是汾河之北悵矣懷抱悠哉川域憶昔過庭童顏稚  
齡何賞不極何遊不經弄春風於磻戶詠秋月於山扃  
北窓照雪南軒聚螢綵衣扇枕緇布開經何期樂之易  
失倏銜哀而茹恤天未悔禍遭家不祚子歿先亡公明

早卒餘自此而浩蕩又逢時之不仁天地遂閉雷雲漸  
屯與沮溺而同耻共夷齊而隱身幸收元吉生偶昌辰  
容北海之嘉遁許南山之不臣養拙辭官舍和保真豈  
若馮敬生之訓世趙元淑之尤人殷憂耻賤憔悴傷貧  
探井臼而無樂歷山河而若辛豈如我家生事都虛棄  
置不念當歸寧圖遠志坐青山而非隱遊淶潭而似喜  
舊知山裏絕氛埃登高日暮心悠哉子平一去何時返  
仲叔長遊遂不來幽蘭燭夜之琴曲桂樹凌晨之酒盃  
丘園散誕窟室徘徊坐等枯木心如死灰亦有山羞野  
饌蘭漿水麩杞菜前羹松根溜醪既採藥而為食諒隨  
情而不矯負錦春前膏鎌歲杪草漸密而饒獸樹弥深  
而足鳥地寂寞而森沉路縱橫而窈窕野亭鸛唳山梁

雉鳴遠遊之所幽栖之次或抱犢而新來乍聞鷄而始  
藿畦一兩茅齋數四山為險而無人嶺時平而有地石  
菌抽菜金芝吐穗鏡厭山精刀驅木魅泉遶砌而魚躍  
樹橫窓而西卒天網寬寬人心豈難飲河知足巢林必  
安亦何榮而拾紫亦何羨於還丹紅藜促節之杖綠籜  
班文之冠野餐二簋園蔬一盤送阮籍而長嘯得劉伶  
而甚懽曉入柴戶春歸藥欄老萊地僻却生谷寒楊柳  
則垂條鍛沿杏樹則花飛坐壇賦成鼓吹詩如彈丸携  
始醉之鳴鶴對新婚之伯鸞我有懷抱蕭然自保古人  
則難與同歸紛吾則此焉將死礪溪沼渚之蘋艾丘陵  
阪險之桑棗接果移棠栽苗散稻不藏無用之器不愛  
非常之寶抵玉驚禽揮金雉草接朋友於盃案弄兒孫

於緹緹樂山澤之浮遊笑江潭之枯槁戒非佞佛齋非  
媚道言譽無功形骸自空坐成老圃居為下農身與世  
而相弃賞隨山而不窮披衣竈北逐食墻東儻有白頭  
四皓厖眉八公小童乘日仙人馭風鄉老則杖頭安鳥  
邦君則車邊盡熊心期閣合道術潛同解來相訪遇公  
谷中

元正賦

若夫四時定歲三元啓正無許都之日蝕值荊州之雪  
晴風雲淑暢宇宙融明磔鷄厭疫懸羊助生趙國則庶  
人鳩獻漢郡則治中鶴驚尔其儺燈夜驚齋筵風設送  
終奉始之義餞二筵三之節土風則白蕪為娛斗柄則  
青龍主悅改容端表門新戶潔况復春來氣序和家家

少長相經過旦朝恭賀密年前婚嫁多少婦裝金翠遊  
童盛綺羅椒花頌逎廻文寫柏葉樽宜長命歌遙憶二  
京風日好玉城正殿年光早旌旆曄曄千門路冠蓋紛  
紛兩宮道天子拜安平儲官迎太保大農司飲食之節  
尚書奏會期之草錫酒則濡淶新知加飲則彫胡始造  
逼側駢填威儀折旋樂調百戲觴稱萬年西京馬騎和  
鍾鼓東國魚龍雜管絃日斜班束帛彤闈黜將夕但願  
皇家四海平每歲常期萬方客則有故國人獨守寒鄉  
春昨夜竹聲驚百魅今旦桃符安四鄰歲酒輕三老年  
盤費五辛老夫無所欲光陰苦難足試看鷺鷥何日還  
坐望歸鴻已相續莫愁來歲晚但悵前塗促年年歲歲  
有元正何年何月罷逢迎聊獻雀而相賀且吞鷄而自

營取樂長往栖身太平何必觀后障之紗緯仰皇帷之  
緘成辭御床而表德坐重筵而發名乃為歌曰獻歲風  
光早芳春節會多徑潘三月內恣意飽經過

三月三日并序

余以大業四年獲遊京邑暮春三月整騁娛遊新停隱  
士之舡即赴群工之席賞閑興洽接袂方轅西望昆池  
東臨灞岸帷屏竟野士女盈川寶馬香車星流雲布氣  
鮮風暖誠如褚與之詞絡繹繽紛正是張衡之說不能  
默爾聊為賦焉同博奕之猶賢取彼流之順俗終非白  
玉未可抱之而悲近等黃花猶當嗑然而笑云爾

年去年來已復春三月三日倚河湄正是地名為禊飲  
辰傾兩京之貴族聚三都之麗人自須被穢非徒解伸

潘尼已向天淵渚表紹應過薄洛津舊嫌晦日年芳早  
情知上巳風光好誰家園裏泛紅花何處堤傍無綠草  
翠幕臨流灞池曲朱帷曜野橫橋道橋石岸而誅茅入  
砂塲而藉藁艷艷風光欣欣懷抱南鄰戚屬北里豪家  
舊來常蕩平居自奢逢上林之卷霧值章臺之吐霞塵  
半濕而街靜氣全收而野華蒲梢果下之龍騎繡軸珠  
輪之犢車錦則鳳凰街葉綾則鴛鴦戴花粉色傾新市  
衣香滿處斜歷鄴城而轉蓋臨渭浦而停笳坐帷櫬犀  
角行床鋪象牙洛都故事陳留風俗障額鈎枝釵梁填  
粟玉盤盛果盃瓶泛醪案列萬錢盃流九曲戲分群聚  
人多座促爭臬帝女之壺闔彩曹王之局六傳退而臬  
盡樗蒲停而馬足新投素舛始泛玄醪洞簫徐引仙琴



對操喧趙瑟而絃急促秦箏而柱高連歌合舞節鼓鳴  
鼗方響銀纏架琵琶金屑槽席闌賞洽情盤樂恣從榻  
渠邊回筵水次臨石礎而爭洗倚橋欄而半醉浪動梟  
移沙平鴈萃萍著浦而偏密荇連汀而漸穠樹泊漁舟  
莎侵釣地沉玉轄而初設貫銀鉤而欲墜網飭茱萸竿  
裝翡翠振鱗挑尾穿腮酌鼻金門舊學玉署新賢修太  
玄於暮菴擅中黃於早年校書芸閣之上射策蘭臺之  
前鳴騶北闕合集東川斲疑林竹逕真成都柳泉琴樽  
促賞少長同筵九班麟角之仙筆五色魚羅之綵牋杜  
篤題新賦張華挾雅篇問哲而知博談子房而著玄李  
膺猶捧手王澄偃仰眠羽林名騎期門謁者勇振行間  
聲高帳下鐵散文鏃銀鞍鏤瓦新彎拓月之弧始被蘭

池之馬既指盃而水綠亦鳴鞭而汙赭射堂高望脩櫺  
迥尋弓聲中絕箭道平臨暈張棚滿塵驚埒深始銅穿  
而石漏終鴈斷而猿吟帶周遭玉鞘縫恰金大堤諸絕  
艷中城之少女揔角當壚初笄弄杼臨鏡臺而憶昔出  
香街而嘯侶錦袖爭垂花鈿半舉浮絳棗而相逐慙紅  
蘭而延佇照影窺潭煎衫傍渚新開避忌之席更作招  
魂之所相呼携手共留連著晚風光最可惜棠梨別館  
低斜日鵲鵲重樓含暮煙樹下遺香粉砂頭送紙錢尋  
春須得遍但任莫言旋紫騮停策青牛駐憶看射雉於  
平臯送乘羊於御坂悵望原隰徘徊林畹詎念城遥寧知  
伴遠聞烏啼而訝夕憶蠶飢而慮晚別有公子盛光儀  
羽蓋相將連騎馳出入芙蓉苑經過連弓陂爭傳塞下

梅花在強報閨中桑葉萎閨鷄宣曲路泛鷁昆明池浪  
影文青雀汎光濺綠熊若非五陵遊俠少定是三秦輕  
薄兒玉笛吹楊柳金冠飭鷁鷁念山日之嬉戲亦無窮  
之賞託但是津傍悉泛舟若箇山頭不投幕俎席交時  
烟霞綺錯何縣何州無林無壑俗非溱洧風成鄴洛年  
年歲歲傾城傾郭祇為春光動性靈剝使娛遊不整停  
南度橋邊無數醉東流水上幾人醒隱士舡中藥秦王  
劍裏銘若嫌鄭國桃花浦為向山陰蘭棹亭

鷁賦

龍星掌歲鳳律移灰弱條垂柳殘花落梅鷁候煖而初  
轉鷁排喧而始來鷁玉戶之全掩喜珠簾之半開出入  
金龍殿瞻視銅雀臺何茲禽之微薄識自然之寒暑恒

連栖兮並處繞翠檻而對語還將擇木之意自覓安巢  
之所昔年居屋桂棟蘭粉今來舊地谷變陵分若非歷  
陽隨水沒定是吳宮遭火焚逢海上之新伴憶秋前之  
故群頡頏騫翥差池羽翼漢黨胡明丹頭素臆並忘情  
而馴擾俱順時而動息止隩延眈依廬表德避戎已而  
銜泥接雲霞而求食壁深巢閣簷高路直匪陋蓬宇誰  
矜杏梁網羅是避鷹鷂是防彼宗類之繁衍實軒庭之  
未光若乃漢家溫室秦帝阿房紫樓青觀金閨玉房何  
歲不集何年不翔縈趙女之歌肆狎燕姬之舞行聲喧  
葉序影亂花牀故能剪爪蒙識風詩入喻傳石璽而無  
疑宿瑤筐而不懼位列司分之職名擅高媒之賦亂日  
昔窺前殿花飛絮迴今過上苑鴈度鴻來光陰遞代搖

落悲哉眼看巢戶遷應壯開

王無功文集卷第一

王無功文集卷第二

詩

靈龜四首

郊園

被徵謝病五首

春日山莊言志

夜還東溪中口號

獨坐

題黃頰山壁

詠懷

山夜

山中別李處士播

初春

遊山贈仲長先生子光

春晚園林

贈薛學士方士

春莊走筆

泛舟河上

題古意贈薛記室

題酒店壁

醉後口號

過程處士飲率爾成詠

劇題卜鋪壁

贈程處士

嘗春酒

解六合承還

獨酌

秋夜喜遇姚處士義山

<sup>山</sup>中獨坐

題畫幃背

山夜調琴

田家

看釀酒

贈學仙者

春園興後

堦前石竹

春日真疏

贈梁公

山園

春日還莊

尋苗道士山居

端坐詠思

山中採藥

晚秋夜座

野望

在邊三首

九月九日

崔使君善為答

冬夜載酒

崔答

讀真隱傳

性不好治產興後言懷

山家夏日九首

洛水南看漢王馬射

靈龜四言

靈龜君子有悔也言明不若昧進不若退彼靈龜兮潛  
伏平坻文列八卦色合四時出遊芳蓮入負神著吐故  
吸新何慮何思赫赫王會峨峨天府謀猷所資吉凶所  
聚爾有前鑒爾既餘將爾有嘉識爾既餘輔爰施長網  
載沉密羅于沼于汜于江于沱既剔既剥是鑽是灼姑



取供用焉知其佗嗚呼靈龜孰謂爾哲本緣末喪命為  
才絕山木自冠膏火自滅敢陳明辭以告來裔

郊園

汾川勝地姑射名辰月照山客風吹俗人琴聲送冷酒  
氣迎春閉門常樂何須四鄰

被徵謝病

漢朝徵隱士唐年訪逸人還言北山曲更坐東河濱  
榆三晉地煙火四家鄰白豕祠鄉社青羊祭宅神  
柘畦侵院角蹙水上渠濬卧病劉公幹躬耕鄭子真  
橫栽桑節杖豎剪竹皮巾鶴警琴亭夜鶯啼酒甕春  
顏回惟樂道原憲豈傷貧藉草邀新友班荆接故人  
市門逢賣藥山圃值肩薪相將共無事何處犯囂塵

春日山莊言志

平子試歸田風光溢眼前野樓全跨迥山閣半臨煙入  
屋欹生樹當堦逆涌泉剪茅通磴底移柳向河邊崩砂  
猶有處卧石不知年入谷開斜道橫溪渡小舡鄭玄唯  
解義王列鎮尋仙去去人間遠誰知心自然

夜還東溪中口號

石苔應可踐叢枝幸易攀青溪歸路直乘月夜歌還

獨坐

託身千載下聊思萬物初欲令無作有翻覺實成虛周  
文方定策秦帝即焚書寄語無為者知君晤有餘

題黃頰山壁

別有青溪道斜亘碧嵒隈崩榛橫古蔓荒石擁寒苔野

心長寂寞山逕本幽迴步步攀藤上朝朝負藥來幾看  
松葉秀頻值菊花開無人堪作伴歲晚獨悠哉

詠懷

桑榆汾水北煙火濁河東未必尋歸路居然息轉蓬故  
鄉行處是虛室坐間同日落西山暮方知天下空

山夜

仲尼初返魯藏史欲辭周脫落四方事栖遑萬里遊影  
來徒自責心盡更何求禮樂存三代煙霞主一丘長歌  
明月在獨坐白雲浮物情勞倚伏生涯任去留百年一  
如此世事方悠悠

山中別李處士櫟

為向東溪道人來路漸賒山中春酒熟何處得停家

春初

春來日漸長醉客喜年光稍覺池亭好偏聞酒甕香

遊山贈仲長先生子光

試出南河曲還起北山期連峯無暫斷絕嶺牙相疑結  
藤標往路刻樹記來時沙場聊憩路石壁旋題詩  
葉秋紅稍下苔寒綠更滋幽尋多樂處勿怪往還遲

春晚園林

不道嫌朝隱無情受陸沉忽逢今旦樂還逐少時心  
捲書藏篋笥移榻就園林老妻能勸酒少子解彈琴  
落花隨處下春鳥自須吟兀然成一醉誰知懷抱深

贈薛學士方士

昔歲尋周孔今春訪老莊途經丹水岸路出白雲鄉  
窈

窈開皇道深沉指太方物情爭逐鹿人事各亡羊  
日看桂樹日下覓扶桑寄語悠悠者誰知此路長

春莊走筆

野客元圖靜田家本惡諠枕山通箇閣臨磻創茅軒約  
略栽新柳隨宜作小園草依三徑合花接四鄰繁野婦  
調中饋山明促上樽曉羹猶未糝春酒不須溫賣藥開  
東鋪粗田向北村夢中逢櫟社醉裏覓桃源猪肝時入  
饌犢鼻即裁褌自覺勲名薄方知道義尊所嗟同志少  
無處可忘言

泛舩河上

初晴何以慰薄暮理輕舟白雲銷向盡黃河曲復流隨  
風依北岸逐浪向南洲波瀾浩淼懷抱直悠悠自覺

生如寄方知世若浮蓬萊何處在坐使百年秋

薛記室收過莊見尋率題古意以贈

伊昔遭喪亂歷數當閔餘豺狼塞衢路桑梓成丘墟餘  
及爾皆亡東西各異居爾為培風鳥我為涸轍魚建承  
雲雷後欣逢天地初東州聊下釣南畝試揮鋤資稅幸  
不及伏臘常有儲散誕時須酒蕭條嬾向書朽木不可  
彫短翮將焉據故人有深契過我蓬蒿廬曳履出門迎  
握手登前除相看非舊顏忽若形骸疎追悼宿昔事功切  
心相於憶我少年時携手遊東渠梅李夾兩岸花枝  
何扶疎同志亦不多西莊有姚徐嘗愛陶淵明酌醴焚  
枯魚嘗學公孫弘策杖牧群豬追念甫如昨奄忽成空  
虛人生詎能幾感迫常不舒賴有北山僧教我以真如

使我視聽遺自覺塵累祛何事須筌蹄今已得免魚舊  
遊儻多暇同此釋紛拏

題酒店壁

昨宵瓶始盡今朝甕即開夢中占夢罷還向酒家來

醉後口號

阮籍醒時少陶潛醉日多百年何足度乘興且長歌

過程處士飲率爾成詠

莫道山中泉石好莫畏人間行路難蜀郡鑪家何必開  
宜城酒店舊來寬盃至定知懸恠晚飲盡祇應速唱看  
但使百年相續醉何愁万里客衣單

劇題卜鋪壁

旦遂劉伶去宵隨畢卓眠不應長賣卜須得杖頭錢

贈程處士

百年長擾擾萬事悉悠悠日光隨意落水勢任情流  
禮樂因姬旦詩書傳孔丘不如高枕卧時取醉銷愁

嘗春酒

野盃浮鄭酌山酒漉陶巾但令千日醉何惜兩三春

解六合承還

我家滄海白雲邊還將別業對林泉不用功名喧一世  
直取煙霞送百年彭澤有田惟種黍步兵從宦豈論錢  
但願朝朝長得醉何辭夜夜寃間眠

獨酌

在生知幾日無狀遂空名不如多釀酒時向竹林傾

秋夜喜遇姚處士義



北場耘霍罷東臯刈黍歸相逢秋月滿更值夜螢飛

山中獨坐

試逐遊山去聊觀避俗情  
引流還當井憑樹卽為楹  
酒中添藥氣琴裏作松聲  
石鑪煎玉髓土釜出金精  
水碧連年服雲丹計日成  
還看市朝路無處不營營

題畫幃背

雲霞圖幃子山水畫屏風  
不應須對許坐慣青溪中

山夜調琴

促軫明月抽弦對白雲  
從來山水韻不使俗人聞

田家

阮籍生年嬾嵇康意氣疎  
相逢一飽醉獨坐數行書  
小池聊養鶴閑田且牧猪  
草生元亮迳花暗子雲居  
倚杖

看婦織登壇課兒鋤  
迴頭尋仙事併是一空虛

看釀酒

六月調神麴正朝汲美泉  
從來作春酒未省不經年

贈學仙者

採藥層城遠尋師海路賒  
玉壺橫日月金闕斷煙霞  
伶人何處在道士未還家  
誰知彭澤意更道步兵耶  
春釀煎松葉秋蘓泛菊花  
相逢寧可醉定不學丹砂

春園興後

比日尋常醉經年獨未醒  
迴瞻後園柳忽值數行青  
定是春來意低頭更好聽  
歌鶯遶亂動蓮葉遶池生  
散腰追阮籍招手喚劉伶  
萬架窺前空未餘几小瓶  
風光須用却留此待誰傾

堦前石竹

上天布甘雨萬里咸均平自顧微且賤亦得蒙滋榮  
萋萋結綠枝曄曄乘朱英常恐零露降不得全其生  
歎息聊自思此生豈我情昔我未生時誰者今我萌  
棄置勿重陳委化何所營

春日直疏

春夜猶自長高窓來月明耿耿不能寐振衣步前楹  
懷抱甞無擾自覺形神清遐想太古事俯察今世情  
淳薄何不同運數之所成歎息萬重陳已聞晨鷄鳴  
迴首東南隅誰知忘機者寂泊存其精

贈梁公

我欲圖世樂斯樂可常位大招譏嫌祿極生禍殃  
聖莫

莫若周公忠豈踰霍光成王已興誚宣帝恒負芒范蠡  
何智哉單舟戒輕裝踈曠豈不懷杖策還故鄉朱門雖  
足悅赤族亦可傷履霜成堅冰知足勝不祥我本窮家  
子自言此見長功成皆能退在昔誰滅亡

山園

幽人養性靈長嘯坐山齋二月蘭心紫三春柳色青  
簾看水石開牖望園亭琴曲唯留古書名半是經風煙  
長入詠几杖悉為銘切直平生盡何為勞是形

春日還莊

居人姓仲長端坐悅年光地形疑谷口川勢似河陽  
傍山移草石橫梁種稻梁滋蘭依舊晚接菓著新行  
自持茅作屋無用杏為梁蓬埋張仲徑藪破管寧沐  
浴蠶溫

織室分蜂暖蜜房竹密連堦暗花飛滿宅香坐棠思邵  
伯看柳憶嵇康自得終焉趣無論懷故鄉

尋苗道士山居

抱琴欲隱去杖策訪幽潛青溪無限曲丹障幾重簾水  
聲全繞砌樹影半橫檐甌塵炊暫拂鑪香盡更添短茅  
新縛薦細簷始編簷寫呪桃為板題經竹作籤紫文千  
歲蝠丹書五月蟾三山今遠近飛路幸相魚

端坐詠思

張衡賦四愁梁鴻歌五噫慷慨  
惟悴將焉如紛  
吾獨無悶高卧喜閑居世途何足數人事本來虛三王  
無定策五帝有殘書咄嗟建城市倏忽觀丘墟明治若  
不足昏暴常有餘寄言忘懷者歸來任卷舒

山中採藥

採藥北山陰乘興獨幽尋  
澗尾泉恒細山腰溪轉深  
石橫疑路斷雲暗覺峯沉  
薄暮歸來去松丘橫夜琴

晚秋夜坐

園亭物候奇舒嘯樂無為  
芰荷高出岸楊柳下歌池  
蟬螭黏遠舉魚驚釣暫移  
蕭蕭懷抱足何藉世人知

野望

薄暮東臯望徙倚將何依  
樹樹皆秋色山山唯落輝  
牧人驅犢返獵馬帶禽歸  
相顧無相識長歌懷採薇

在邊三首

客行秋未歸蕭索意多違  
鴈門霜雪苦龍城冠蓋稀  
空廬還作室短褐更為衣  
自憐書信斷空瞻鴻鴈飛

又

羈旅滯胡中思歸道路窮猶擎蘓武節尚抱李陵弓漢  
北平無樹關南迥有風長安知遠近徒想灞池東

又

昔歲銜王命今秋獨未旋節毛風落盡衣袖雪霑鮮  
海平連地狼山峻入天何當携侍子相逐拜甘泉

九月九日贈崔使君善為

野人迷節候端坐隔塵埃忽見黃花吐方知素序迴  
暎崑崙千段發臨浦萬株開香氣徒盈把無人送酒來

崔使君善為答

秋來菊花氣深山客重尋露葉疑涵玉風花似散金  
摘來還泛酒獨坐即徐斟王弘貪自醉無暇覓楊林

冬夜載酒於鄉館尋崔使君善為

思君夜漸闌載酒一相看野館含煙冷山衣紀雪寒停  
車聊捧袂倒屣共臨盤今夕山陰賞誰知逢道安

崔荅崔時為本郡刺史

頌條忝貴鄉懸榻久相望處士同揚鄭邦君謝李彊詎  
知方擁簪逢子酌惟桑明朝蓬戶側會自謁任棠

讀真隱傳見披裘公及漢濱老父因題

四韻

被褐延陵逕耕田漢水陰由來駢擊壤何處視遺金季  
子停驂謝張溫下道尋世人無所識誰知方寸心

性不好治產興後言懷

自有人間分何須郭外田和光遊聚落獨與入山泉河



曲編蕭坐靈臺結絮眠還應多藏客辛苦沒殘年

山家夏日九首

寂寞坐山家蕭條翫物華樹倚全擁石蒲長半侵砂池  
光連壁動日影對窓斜石榴蕪布菜金荳唯作花落藤  
斜引蔓伏笋暗抽牙高卧長無客方知人事賒

又

隱士長松壑先王孤竹丘溪深常抱凍澗冷鎮含秋九  
春寧解褐五月自披裘誰信湯年旱山焦金石流

又

山中舊可安無處不盤桓嶺澁攀藤易崑崎策杖難藥  
供無限食石起自然壇樹密簷偏冷泉深堦鎮寒松根  
聊入釀竹實試調丹孔淳書數帙朝朝還自看

又

嵒居何啻好野性本規閑青松生戶側奔泉湧砌間老  
父循渾沌稚子服編爛自得為巢許無勞買却山

又

追涼剝不歸高卧隱松闌野竹欄堦種嵒花入戶飛磴  
幽入路斷山曠鳥啼稀不特嫌周粟時時須採薇

又

山人有弊廬竹樹近扶疎嵒開竈井橫磴引庭除障  
子遊仙畫屏風章草書誰言非面俗更欲賦閑居

又

幽居枕廣川長望鬱芊芊北巖採樵路東坡種藥田磴  
泉通院井山氣雜厨煙向夕林庭曠蕭條鳴一絃

又

山居自安可樂道不為難甲乙題書卷梧桐數藥丸樹  
陰連戶靜泉影度窓寒抱琴聊倚石高眼風自彈

又

避暑長宮東蕭條趣不窮密藤成斗帳疎樹即簷櫳  
花礙前浦荷香欄上風寄言覆苔客無事果園中

洛水南看漢王馬射

君王馬態驕蹀躞過河橋雨息銅街靜塵飛金埒遙鐵  
絲纏箭脚玉片抱弓腰日矜百中唯看楊柳條

王無功文集卷第二

王無功文集卷第三

詩

駕過觀獵

山中獨坐自贈

自答

過鄭處士山莊二首

病後醺宅

初春

尋蘇道士四首

過鄉學

春莊酒後

題酒店樓壁絕句八首

食後

採藥

山中避暑

春桂問答

圍碁

詠隱

贈李徵士大壽

飲酒醉後自問答二首

晚年叙志

廬新年平宅賦古題

別鄉中故人

獨坐

同蔡學士詠雲

贈山居黃道士

新園旦坐

未婚山中叙志

閱家書

古意六首

九月九日

登龍坂二首

辛苦

詠秋蓬

在京思故國

遊山寺

觀石壁諸龕

久客齊府病歸言志

裴僕射宅詠妓

秋園夜坐

駕過觀獵

天巡揔禁營詰旦擁戈城旗常紛出沒鼓騎鬱縱橫圍  
塵千里暗獵火四山明獸竭郊園迥禽彈灌莽平割鮮

同飲至振旅以休兵動作威容備周旋軍令成金饒清  
御道玉鼓節神行別有磻溪叟無日戰逢迎

山中獨坐自贈

幽人似不平獨坐北山楹雋妻梁處士別婦許先生擯  
俗勞長歎尋山倦遠行空山斜照落古樹寒烟生解組  
陶元亮辭家向子平是非何處在潭泊苦縱橫

自答

公子澹無為非閑懷 移老萊猶有婦王霸豈無兒人  
世何勞萬生涯故可知溪流無限水樹長自然枝竹林  
橫 梧桐倚惠施揚朱邠早計煩此泣途岐

過鄭處士山莊二首

鑒溪南浦曲裁援北品阿野膳調藜荏山衣緝薜蘿釣

潭因舊迹樵路起新歌欲知幽賞處青青松桂多

又

僻處開三徑幽居無四鄰橫文彪子褥碎點鹿胎巾斷  
籬栖夜雉荒砌起朝麝暮薄東溪上猶言在渭濱

病後醺宅

公幹苦沉綿居山畏不延白驢迎荊子青牛下葛仙度  
符南竈曲寫呪北堦前龍行初禁火鳥步即凌煙淨席  
三天坐香鑪五帝筵埋沙穰疫氣鎮石禦凶年鬼用沉  
為壁神將紙作錢山精愁鏡厭野魅怯燈然今日楊雄  
宅應堪草太玄

初春

前旦出園遊林花都未有今朝下堂望池水開已久雪

避南軒梅風催北庭柳遙呼竈前妾却報機中婦年光  
恰恰來滿甕營春酒

過山觀尋蘇道士不見題壁四首

暫出東陵路過訪北嵒前蔡經新學道王烈舊成仙駕  
鶴來無日乘龍去幾年三山銀作地八洞玉為天金精  
飛欲盡石髓溜應堅自悲生世促無暇待桑田

又

上月芝蘭徑中嵒紫翠房金壺新煉乳玉釜始煎香六  
局黃公術三門赤帝方吹砂聊作鳥動石試為羊緱氏  
還成促瀛洲會日長誰知北嵒下延首詠霓裳

又

結衣尋野路負杖入山門道士言無宅仙人更有村斜



溪橫桂樹小徑入桃源玉床塵稍冷金鑪火尚溫心疑  
遊北極望似陟西崑迎秋還舊里蕭條訪子孫

又

真經知那是仙骨定何為許邁心長切嵇康命自奇桑  
踈金闕迫苔重石梁危照水燃犀角遊山費虎皮鴨桃  
關已重龍竹未經騎為向天仙道栖遑君詎知

### 過鄉學

杖藜尋學舍樞衣向講堂杏壇花正落槐市菜新長聚  
徒疑魯國遊人即鄭鄉先生坐不議弟子入成行卽元  
供洒掃劉俊脫衣裳組帶填中塾青襟溢下庠佩玃情  
已變術蟻藝應光寄語安眠者無為糞土牆

### 春莊酒後

郊扉乘曉闕山醞及年開柏葉投新釀松花潑舊醅野  
妻臨甕倚村豎捧瓶來竹溜還作杓樹癭即成盃北潭  
因醉往南畝帶星迴田家多酒伴誰恠玉山頽

題酒店樓壁絕句八首

洛陽無大宅長又安乏主人黃金消欲盡祇為酒家貧

又

竹葉連槽翠蒲桃帶麴紅相逢不令盡別後為誰空

又

對酒但知飲逢人莫强牽倚爐便得睡橫甕足堪眠

又

欲識幽人伴非是俗情量有業開屠肆無名坐餅行

又

或問遊人道那能獨步憂飲時含枚藥醉罷不能愁

又

此日長昏飲非閑養性靈眼看人盡醉何忍獨為醒

又

有客須交飲無錢可別酤來時長道費慙媿酒家壺

又

仲任書卷盡平君不數充相逢何以慰細酌對春風

食後

田家無所有晚食遂為常菜剪二秋綠殮炊百日黃胡  
麻山麴樣楚豆野麋方始曝松皮脯新添杜若漿葛花  
消酒毒萸蒂發薰香鼓腹聊乘興寧知逢世昌

採藥

野情貪藥餌郊居倦蓬蓽青龍護道符白犬遊仙術腰  
連戎已且負歸丙辛日時時斷障橫往往孤峯出行披  
葛仙經坐檢神農帙龜蛇採二靈赤白尋雙朮地凍根  
難盡叢枯苗易失從容肉作名薯蕷膏成質家豐松菜  
酒器貯參花蜜且復歸去來刀圭養衰疾

### 山中避暑

幽人自可吟避暑更蕭然片雲堪度雨小樹即生煙巖  
雪頻經夏溪水定幾年橫堦看卧石隔牖聽飛泉地使  
炎涼變人疑歲序遷詎知來遁俗更似得逃年

### 春桂問答

問春桂桃李正芳華年光隨處滿何處獨無花  
春  
桂苔春華詎能久風霜搖落時獨秀君不知

圍碁

飽食端居暇披襟奕思專彫盤蜃脰飾帖局象牙緣裂  
地四維舉分麾兩陣前攢眉思上策屈指計中權勁卒  
衡圓度奇軍略地旋魚鱗張九拒竊翅擁三邊逐征何  
待應爭鋒豈獸先雙關防易斷隻眼畏難全將嬌多受  
辱敵耻屢摧堅驟觀成為敗頻看絕更連許知愁越復  
恤弱貴邢遷詵俗韋弘嗣邀名葛稚川分陰雖可重小  
道詎宜捐相公摧屐日樵客爛柯年唐堯猶不棄孔父  
尚稱賢博術存書錄壺經著禮篇寄言陸士衡無嗤王  
仲宣

詠隱

獨有幽栖趣能令俗網賒耕夫田作業巢叟樹為家晚

谷柔殘黍春園掃落花  
惓然乘興往何必御雲車

贈李徵士夫壽

孔淳辭散騎畦畝避中郎  
幅巾朝帝罷策杖去官忙  
附車還趙郡乘舡向武昌  
九徵書未已十辟譽彌彰  
副君迎綺季天子送嚴光  
灞陵幽徑近磻溪隱路長  
編蓬還作室績草便為裳  
會稽置樵處蘭陵賣藥行  
著書維道德傳教正農桑  
別有懷幽侶由來高讓王  
前年辭厚幣今歲反家鄉  
有書橫石架無甌坐土床  
蘭英猶足釀苴實本兼糴  
澗寒松轉直山秋菊自香  
管寧存祭礼王霸列朝章  
去去相隨去披裘驕盛唐

春夜過翟處士正師飲酒醉後自問答

二首

樽酒泛霞流相將臨歲華酣歌吹樹葉醉舞拂燈花對  
飲情何已思歸月漸斜明朝解醒處為道向誰家

又

春來物候妍夜飲但留連晚搶交鬢側殘樽倚膝前縱  
橫抱琴舞狼藉枕書眠解醒須及署路遠莫言旋

晚年叙志示翟處士正師

弱齡慕奇調無事不兼修望氣登重閣占星上小樓明  
經思待詔學劍覓封侯棄繻頻北上懷刺幾西遊中年  
逢喪亂非復昔追求失路青門隱藏名白社遊風雲私  
所愛屠博暗為傳解紉曾霸越釋難頗存周晚歲聊長  
想生涯太若浮歸來南畝上更坐北溪頭古岸多盤石  
春泉足細流東隅誠已謝西景懼難收無謂退耕近伏

念已經秋庚轅逢處跪陶潛見人羞三晨寧舉火五月  
鎮披裘自有居常樂誰知我世憂

盧新平宅賦古題得策杖隱士

策杖尋隱士行行路漸賒石梁橫澗斷土室映山斜孝  
然縱有舍威輦遂無家置酒燒枯葉披書坐落花新栗  
滋水釣舊結茂陵置歲歲長如此方知輕世華

被舉應徵別鄉中故人

皇明照區域帝恩屬風雲燒山出隱士治道送徵君自  
惟蓬艾影叨名蘭桂芳使君留白壁天子降玄纁山鷄  
終失望野鹿暫辭群川氣含丹日鄉煙間白雲停驂無  
以贈握管遂成文

獨坐



問君樽酒外獨坐更何須有客談名理無人索地租三  
男婚令族五女嫁賢夫百年隨分了未羨陟方壺

同蔡學士君知詠雲

固陽陰正密侍族 方和巫山臣作賦汾水帝為歌繪  
色還成錦輕飛更作羅無衣昔有詠飄轉獨如何

贈山居黃道士

潔身何必是避俗豈能全動息都無畷浮沉最可憐  
山高士傳莊叟讓王篇逃名遂得志 若為傳

新園旦坐

林宅資餘構園亭今創營接梨過半箸從此近全生  
鑒沼泉三漏為山九仞成草香羅戶穴茅茹結簷楹松栽  
一當伴柳種五為名獨對三春酌無人來共傾

未婚山中叙志

物外知何事山中無所有風鳴靜夜琴月照芳樽酒直  
置百年內誰論千載後張奉聘賢妻考萊藉嘉偶孟光  
儻未嫁梁鴻正須婦

閱家書

張氏前鈔本班家舊賜餘尚應千許帙何啻五盈車縫  
悉龜文印題皆章瓜書牙籤過半在玉軸已全踈縈繫  
防黏蠹芸香辟紙魚下惟堪發憤閉戶足為儲為向揚  
雄說無勞羨石渠

古意六首

幽人在何所紫晶有仙躅月夜橫寶琴此外將安欲材  
袖嶧山榦微點崑丘玉漆抱蛟龍屑絲纏鳳凰足前彈

廣陵罷後以明光續百金買一聲千金傳一曲世無鍾  
子期知誰心所屬

又

竹生大廈溪蒼蒼富奇質綠葉吟風勁翠莖犯雪密霜  
霞封其阿鶯鶯食其實寧知軒轅後更有伶倫出刀斧  
俄見尋根株坐相失裁為十二管吹作雄雌律有用雖  
自傷無心復招疾不如山上草離離保終吉

又

寶龜尺二寸由來宅深水游浮五湖內宛轉三江裏何  
不深復深輕然至溱洧溱洧源流狹春秋不濡軌漁人  
逝往還網罟相縈藟一朝失運會剝蕩血流死枯骨輸  
廟堂鮮腹籍籩簋棄置誰怨尤自我招此否餘靈寄明

卜復來欽所履

又

松生北巖下由來入徑絕布葉梢雲煙掙根擁嵒穴自言生得地獨負凌寒潔何時畏斤斧幾度經霜雪風驚西北枝電損南東節不知歲月久稍覺條枝折籐蘿上下碎枝幹縱橫裂行當糜爛盡坐共灰塵滅寧聞匠石顧豈為王孫折衰盛自有期聖賢未嘗屑寄言悠悠者無為嗟大耋

又

桂樹何蒼蒼秋來荷更芳自然歲寒性不知露與霜幽人重其德從植臨前堂連拳八九樹偃蹇二三行枝枝自相糾葉葉還相當去來雙鴻鵠栖息兩鴛鴦榮陰誠

不厚斤斧亦物傷赤心許君時此意那可忘

又

采鳳欲將歸提籬出郊訪羅張大澤已鳳入重雲颺朝  
栖崑閬木夕飲蓬壺漲問鳳那遠飛賢君坐相望鳳言  
何深德微禽安足向但使雛卵全無令贈繳放皇臣力  
收舉帝樂簫韶暢自有來巢時明年阿閣上

九月九日

九月九日重陽節三秋季月殘  
菊花催晚菜萸房  
避早寒霜濃鷹擊速霧重鴈飛難誰憶龍山外蕭條邊  
興闌

登壠板二首

客行登壠板長望一思歸地險闕山窵天平鴻鴈稀轉

蓬無定去驚葉但知飛日極征途遠勞情歌式微

又

壠坂三秦望遊人萬里悲何關鳴咽水自是斷腸時風  
高黃葉散風下白雲滋悵望東飛翼憂來不自持

建德破後入長安詠秋蓬示辛學士

遇坎聊知非蓬風或未歸孤根何處斲輕葉強能飛

辛荅

託根雖異所飄葉早相依因風若有便更共入雲飛

在京思故國見鄉人遂以為問

旅泊多年歲志去不知迴忽逢門外客道發來歛

眉俱握手破涕共銜盃殷勤訪朋舊屈曲問童孩  
衰宗多弟姪若箇賞池臺舊園今在否新樹也應栽  
柳行疎

密布茅齋寬窄裁經移何處竹別種幾株梅渠當無絕  
水石計揔生苔院果誰先熟林花邨後開羈心祇欲問  
為報不須猜行當驅下澤 去翦故田來 木句從舊本增補

### 遊山寺

赤城仙觀啟青山梵宇裁中天疏竇座半景出香臺鴈  
翼金橋轉魚鱗石道迴經文連樹刻仙影對宮開別有  
迷方者終慙無礙才樞衣祇杖錫歛袂謁浮盃斲識嶂  
閣嶺聊詢劫燼灰持花龍女至獻果象王來講坐真乘  
閨談筵外法摧方希除入難從此滌三災

### 觀石壁諸龕禮拜成詠

萬里疏煙壁千龕對日宮瞻顏猶不暇合掌更難窮嶺  
路橫携斷山心暗鑒通真如何處泊坐費計人功

久客齊府病歸言志

君王却茅寬脩竹正擅藥構山臨下杜穿渠入上蘭天  
人多晏喜賓來盛鵲鸞玉帛鎮花簾金環果盤闕鷄  
新市望走馬章臺看別有恩光重恒嗟報荅難沉綿赴  
漳浦羈旅別長安玄渚蘆花白黃山黎葉丹故人儻相  
念應知歸路寒

裴僕射宅詠妓

妖姬飾淨粧窈窕出蘭房日照當軒影風吹滿路香早  
時歌扇薄今世舞衫長不應須曲誤持此試周郎

秋園夜坐

秋來木葉黃夜半坐林唐淺溜含新凍輕雲護早霜落  
螢飛未起驚鳥亂無行寂寞知何事東籬稍菊芳



王無功文集卷第三

王無功文集卷第四

書

荅刺史杜之松書

杜使君荅書

重荅杜使君書

荅處士房子華書

荅程道士書

與江公重借隨紀書

江公荅書

荅刺史杜之松書

月日博士陳龕至奉處分借家禮并帙封送至請領也  
又承欲相名講禮聞命驚笑不能已豈明公前眷或從

與下走相知不然也走意疎體放性有由然棄俗遺名  
與日已久淵明對酒非復禮義能拘叔夜攜琴惟以烟  
霞自適登山臨水邈矣忘歸談虛語玄忽焉終夜僻居  
南渚時來北主兄弟以俗外相期鄉閭以狂生見待歌  
去來之詩不覺情親詠招隱之詩唯憂句盡惟天席地  
友月交風新年則拍菜為樽仲秋則菊花盈把羅含宅  
內有自幽蘭數叢孫楚庭前空對長松一樹高琴朗嘯  
挈榼携壺直與同志者為群不知老之將至欲令復整  
理簪屨脩束精神揖讓邦君之門低昂刺史之座遠談  
糟粕近棄醪醪必不能矣亦將恐 狗貽夢櫟社見嘲  
去矣君侯無落吾事王君白

杜使君答書

辱書知不降顧悵何已僕幸恃故情度迴高躅豈意康  
成道重不許太守稱宮老萊家君羞與諸侯為友延佇  
不獲如何寄路獨全幸甚幸甚敬想結廬入境植杖山  
阿林壑地之所豐煙霞性之所適蔭丹桂藉白茅濁酒  
一盃清琴瑟數致足樂也此真高士何謂狂生僕憑藉國  
恩濫尸貴部官守有限就學無因延頸下風我勞何極  
前因行縣竇欲祇尋誠恐燉煌孝廉守琴書而不出酒  
泉太守列鍾鼓而空還所以遲迴遂攬轡也僕雖不敏  
識前言道既知尊榮何足恃豈不能正平公之坐酌養  
亥唐屈文侯之睎恭師子夏雖齊桓德薄五行無疑畦  
夸故人一來何損蒙借家禮今見披尋微而精簡而備  
誠經傳之典略閨庭之要訓也其喪禮新義頗有所疑

謹用條問具如別帖想晏荒之餘為銓釋也遲更知聞  
杜之松白

重荅杜使君書

月日佐史揚方至奉報書兼枉別帖垂問家禮喪服所  
義五道度情振理探幽洞微誠非野人所敢酬析但先  
人遺旨頗曾恭習雖困於荒晏猶憶於異聞謹因還使  
條申如左夫三年之喪情禮之極有正有義因事之作  
也正喪之縗三升而已至於義服加其半焉豈非義有  
離合之理情無遷奪之法然親尊罔極冠受可均切至  
或殊縗加其半微以見志有何怪焉至如父為長子獨  
施斬服蓋以所承者重情寄特非唯親親且尊尊也至於  
庶子已不承尊雖有長子無預祖祢不為服斬義亦

可知但古之君臣有國有家相承繼體血祀長存大宗  
小宗較然有別繼祖繼禰由茲可推故曰天子不絕國  
諸侯不絕家貴人之宗也故別子為祖父繼之為大宗  
百代不遷之宗也已父為祢兄繼之為小宗此四代則  
遷之宗承百代之重且得不為其長子斬乎為四宗之  
祖亦且得不為其長斬乎唯繼祢之第無預祖祢庶子  
之義施此而已自秦漢已來家國道廢雖有其禮將安  
所行逮乎晉末中原大亂國內至親尚不相保祖祢之  
序知何以明故僕先君獻公因事起義欲使無逆於古  
且令可行於今以為今之分爵頗存古號雖無其實尚  
有其名故以始受封者猶古之諸侯諸侯之庶子即古  
之別子也別子之庶子即古之小宗也雖國破家亡朝

廷市變課錄存錄宗次可推咸可一依古礼行之私室  
至如沉二耕者悠二黔首族姓猶不能自辨何暇及於  
宗庶之事乎此古之先王所以不下禮於庶人也有何  
不可而乃疑乎至若夫妻之道誠為義合而家道之睦  
斯為首焉故傳曰妻至親也一體之名均於天性故妻  
之於夫也其服曰斬蓋移於父母之重焉夫之於妻也  
綦而有杖則踰於兄弟之切焉前賢往達曾無異議故  
曰妻者齊也一齊而不易如至失礼而出違妻之道終  
喪而嫁棄婦之義也違道棄又義何述焉苟全道義則  
天親也天親之服有何義乎列之正服斯為當矣此先  
君獻公探記傳之旨大明後來之失彰人倫之源穆伉  
儷之道也夫何痛哉明疑又去君臣夫妻俱以義合而

妻為正服臣為義服則君臣之際如夫婦之情乎斯不然矣何者夫礼有以情作者父子夫婦之類是也有以義作者君臣夫妾之類是也情義之極俱然于斯此其無升降明矣但礼之為用緣情以至理因内以及外情者入之深心愚智之所共也孰有愚者而忘其妻子乎理者入之大節凡聖之所異也實有凡生而忘其臣妾焉故情者正也此妻子所以荷深心而報夫婦以正服也理者義也此臣妾所以存大節而申主以義服也故夫正義之作殊情而共礼也孰謂君臣之義而謝夫婦之情乎孰謂夫婦之情而厚君臣之義乎古之君子常度情以處斷義而行矣義可度情奪衛石碣不能存其子情不言義宮之奇得其以族行故曰情義殊也情義均



也故情義之服有正焉有義焉正焉之禮無厚焉無薄焉此妻為正服所以無害於君臣臣為義服所以不傷於夫婦有倫有要夫何<sup>禮</sup>疑至如三殤之服禮有明文鄭與王杜各申本見由茲紛雜後莫能定然詳諸記義王杜為長其昔在隋末末嘗見諸賢講論此矣近者家兄御史亦編諸賢之論繼諸對問今錄此篇附往幸詳之也至如衆子服朞其妻小功兄弟之子猶子也其服亦朞先儒以為其妻亦小功惟王肅以為喪服之列旁尊皆報朝公以為重於子妻之服失禮之差此則表準之義也夫禮雖緣情亦為義屈故有從無服而有服者亦何嫌乎兄弟子婦越己子之妻乎故曰兄弟之子猶子也蓋引而致之故不嫌於與己子同服矣旁尊不敢

以厭降蓋避正尊而自報也故不嫌於越已之妻矣輕陳  
末學豈能詳究又於楊方奉口處分借王儉札論門庭  
所蓄先無此書往於處士程融處曾見此本觀其制作  
動多自我周孔規模十不存一恐不足以塵大雅君子  
之視聽也尋問儻獲當遣祇送王續君白

荅處士馮子華書

乖別甫爾已十餘年誦採葛之詩增其慨詠夫人生一  
世忽同過隙合散消息周流不居偶逢其適便可卒歲  
陶生云富貴非吾願帝鄉不可期又云盛夏五月跣脚  
東牕下有涼風颭至自謂是羲皇上人嗟乎適意為樂  
雅會吾意吾河渚間元有先人故田十五六頃河水四  
遶東西趣岸各數百步古人云河濟之濱宜黍况中州

之腹乎家兄鑒裁通照知吾縱恣散誕不閑拜揖兼嫌  
批礼義錙銖功名亦以俗外相待不拘以家務至於鄉  
族慶弔閨門婚冠寂然不預者已五六歲矣親儻之際  
皆以山麋野鹿相畜性嗜琴酒得盡所懷幸甚幸甚近  
復廬棄家獨坐河渚結構茅屋并厨廐揔十餘間奴婢  
數人足以應役用天之道分地之利耕耘麓菴黍秫而  
已春秋歲酒以時相續兼多養鳬鴈廣牧鷄豚黃精白  
朮枸杞薯蕷朝夕採掇以供服餌牀頭素書三帙老莊  
及易而已過此以往罕嘗或披忽憶兄弟則渡河歸家  
維舟岸側興盡便返遇天地晴朗則於舟中誦大謝亂  
流趣孤嶼之詩眇然盡山林陂澤之思覺瀛洲方丈森  
然在目前或時與舟人漁子分潭並釣俛仰極樂戴星

而歸題歌賦詩以會意為功不必與夫悠悠閑人相唱和也孤往河渚傍無四鄰聞犬聲望煙火便知息身之有地矣近復有人見贈以五茄地黃酒方及種薯蕷枸杞等法用之有効力省功倍不能暇脩渾沌並常行之裴孔明雖是畏名教物然風之際往往有高人體氣無特受巧性思若有神自作素琴一張去其材是嶧陽孤桐也近携以相過安軫立柱龍唇鳳融實與常琴不同發音吐韻非常和朗吾家三兄生於隋末傷世擾亂有道無位作汾亭之操蓋孔氏龜山之流也吾嘗親受其調頗謂曲盡近得裴生琴更習其操洋洋乎覺聲品相得今便留之恨不得使足下為鍾期良用耿耿吾所居南渚有仲長先生結庵獨處垂三十載非其力不食傍

無侍者雖患瘖疾不得交語風神蕭々無俗氣携酒對  
飲尚有典刑先生又著獨遊頌及河渚先生傳開物寄  
道懸解之作也時取翫讀便復江湖相忘吾往見薛叔  
白牛溪賦韻趣高奇詞義曠遠嵯峨蕭瑟其不可言壯  
哉邈乎楊班之儔也高人姚義常謂吾曰薛生此文不  
可多得登太行俯滄溟高深極矣吾近作河渚獨居賦  
為仲長先生所見以為可與白牛連類今亦寫一本以  
相示可與青溪諸賢共詳之也亂極治至王途漸亨天  
灾不行年穀豐熟賢人充其朝農夫滿於野吾徒江海  
之士擊壤鼓腹輸太平之稅尔帝何力於我哉人知房  
李諸賢肆力廊廟吾家魏學士亦申其才公卿勤々有  
志礼樂元首明哲股肱惟良何慶如之也夫思能獨放

胡海之士堪濟世王者所須所恨姚義不存薛生已歿  
使雲蘿天網有所不該以為歎恨尔吾比風痺發動常  
劣劣不能佳然煙霞山水性之所適琴歌酒賦不絕於  
時時遊人間出入郊郭暮春三月登于北山松柏群吟  
藤蘿翳景意甚樂人箕踞散髮同群鳥獸醒不亂行醉  
不干物賞洽興窮還歸河渚蓬室覓牖彈琴誦書優哉  
聊以卒歲首夏方熱足下如何也願動息多宜黃頰之  
聚何時暫志偶見南風略示所懷畝願弥厚不一二王  
君白

荅程道士書

徐道士至獲書詞義懇切具受之也然吾嘗讀書觀覽  
數千年事久矣有以見天下之通趣識人情之大方語

默紛雜是非淆亂夸者死權烈士殉名貪夫溺財品庶  
安生各是其所同非其所異焉可勝校哉故吾師曰莫  
若俱任而兩忘仲尼所以無可否於其間莊周所以齊  
大小於自適謂神而化之使人宜之百姓日用而不知  
也夫君子所思不出其位道有不同不相為謀蓋為此  
也足下欲使吾適人之適而吾欲自適其適非敢非足  
下之議且欲明吾之心一為足下陳之也昔孔子曰無  
可無不可而欲居九夷老子曰同謂之玄而乘關西出  
釋迦曰色卽是空而建立諸法此皆聖人通方之玄致  
弘濟之祕藏實寄冲鑒君子相期於事外豈可以言行  
詰之哉故仲尼曰善人之道不踐迹老子曰夫無為者  
無不為也釋迦曰三灾彌綸行業湛然夫一氣常凝事

次成萬萬殊雖異道通為一故各寧其分則何異而不  
通苟違其適則何為而不闕故夫聖人者非他也順適  
無闕之名即分皆通之謂即分皆通故能立不易方順  
適無闕故能遊不擇地其有越分而求無闕雖有神禹  
將獨奈何故曰鳬脰雖短續之則悲鶴脰雖長截之則  
憂言分之不可違也吾受性潦倒不經世務屏居獨處  
則蕭然自得接對賓客則恭然思寢加性又嗜酒形骸  
所資河中黍田足供歲釀閉門獨飲不必湏偶每一甚  
醉便覺神明安和血脉通利既無忤於物而有樂於身  
故常縱心以自適也而同方者不過一二人時相往來  
並棄礼数箕倨散髮玄談虛論兀然同醉悠然便歸不  
知聚散之所由也昔者吾家三兄命世特光宅一德續



明六經吾常好其遺書以為匡世之要略盡矣然暉陽之相必俟伯牙烏號之弓必資由基苟非其人道不虛行吾自揆審矣必不能自致台輔恭宣大道夫不涉江漢何用方舟不思雲霄何事羽翮故頃已來都復散棄雖周孔制述未嘗復窺何況百家悠々哉去矣程生非吾徒也若足下者可謂身處江海之上心遊魏闕之下雖欲行志不覺坐馳若以此見經義大道將恐北轅適越所背彌遠矣吾頃如有風疾劣劣不能佳但乘化獨往往所遇爾不能復使离婁役謨託勞精怵心蔽焉以物為事也最哉夫子勉建良圖因山僧還略此達意也

與江公重借隋紀書

久承所撰隋紀繕寫咸畢前舍弟及家人往並有書借

咸不見付豈連城之珍俟楚王而乃進崩山之操待鍾  
期而後發邪正應以左貂右蟬榮冠東省掌壺負璽望  
重南宮朝夕丹墀揖讓增價往來青瑣步頓生光豐屋  
華棖顧蓬蒿而徒眷鳴鍾列鼎想藜藿而移交不與驕  
期遂忘曩時之好爾僕遭逢明聖栖遲丘壑幸悅堯舜  
之風得全箕穎之操雖心期所託道固遙在而出處離  
異儀形難接所以願憑鱗羽宛若承顏望觀述作欣然  
得意足下裁成國典褒貶人倫欲使明鏡一時覆車千  
祀故當貽諸好事豈擬傳子孫方復固其緘滕嚴其扃  
鐫天下之望豈如是乎僕亡兄芮城嘗典著局大業之  
末欲撰隋書俄逢喪亂未及終畢僕竊不自揆思卒餘  
功收撮零尚存數帙肇自開皇之始迄于大業之初成

亡兄黜竄之遺迹也天業之後言閭事闕然僕雖欲繼  
成無可憑探以此尤思見足下所作也還使請致無為  
再三王君白

江公答書

賢弟千牛及家人典琴至頻辱芳翰索下官所撰隋紀  
雖承厚眷滿然自失誠恐持却克之質入邯鄲之墟眷  
曹鄴之晉厯莖英之肆所以遲迴簡牘伏念旬時輒撰  
短懷仰違前命令奉來札誨責逾深既以驕鄙相訶又  
以緘滕致誚欲加之罪其無辭乎正當要使必致爾了  
不知覽兄芮城有隋書之作足下既圖繼就須有考尋  
謹依高旨繕錄馳送然僕雖不佞頗聞君子之論矣嘗  
以為為國以礼君舉必書故左史記言右史記事言者

申功之意也事者叙五德立功之迹也所以明勸沮所以別是非自非可以閔社稷之安危涉天人之興廢古之君子何嘗取諸褒貶之作有由然也自微言泯絕大義乖墜三代之教亂於甲兵六經之術滅於煨燼君人者尚美名以夸六合史官者貴虛飾以佞一時下及馬遷爰逮班固咸有述作庶幾聖賢其於斟酌典謨表章微婉曾不能觸其籬落者也魏晉之際天何足云中原版蕩史道息矣然國於天地有與立焉苟能宅郊裡建社稷樹師長撫黎元雖復五裂山河三分躔次規模典式豈徒然哉是賢兄文仲知其若此也恐後之筆削陷於繁碎宏細正典暗而不宣乃興經元以定真統蓋獲麟之事不徒何足以知之叔達亡國之餘幸賴前列有

隋之末未濫尸貴郡因需善誘頗識大方至若梁魏周  
齊之門耳目者舊所接風流人物名實可知衣冠道喪  
謳謠尚在頃者皇建其極君子道亨憑籍時來妄叨近侍  
廟堂多暇墳典自娛覽後魏周齊之紀傳考乎下官之  
所聞見莫不增減隨意曲直任情叙致浮雜褒貶阿黨  
述時望者以爵祿為榮談陳國紀者以祖謫為能事至  
於密會王道潛濟生人既昧於知音咸寢而不記貪求  
寫其祖父冠冕胤嗣婚姻以為譜牒之證爾豈不痛哉  
風俗之壞一至於此雖人倫王化備列元經而恢談碩  
議或不可捨是以薛記室及賢兄芮城常悲魏周之史  
各著春秋近更研覽真良史也古人云過高唐者與王  
豹之謳遊睢渙者學藻繪之巧竊惟隋氏之王三十六

年成敗否泰目所親睹誠懼後之作者復習向時之弊  
焉故聊因掌壺之暇著隋紀二十卷騁辭流離則媿於  
心矣書事簡要則嘗有志焉孔子曰我欲載之空言不  
如附之行事儻近是乎謹恃時眷以塵清覽當積蕪金  
以購竄爾又恐是紀傳之作湏備異聞今更附王胄大  
業起居注往請檢納也陳叔達白

王無功文集卷第四

王無功文集卷第五

雜著

無心子

負苓者傳

仲長先生傳

五斗先生傳

醉鄉記

自作墓誌文

登箕山祭巢許廟文

祭閔龍逢文

祭龍門祭禹文

祭處士仲長子先文

荆軻刺秦王

項羽死烏江

陳平分社肉

張良遇黃石

禹接蒼水使者

伊尹負鼎見湯

太公釣渭濱

丁推挹樹

鮑衡珠報隋侯

君平賣卜

嵇康坐鍛

蘭相如奪秦王璧

霍光受武帝顧命

梁鴻孟光

老萊養親

甯戚招牛角歌

韓康賣藥

朱雲折檻

伯牙彈琴對鍾期

無心子并序

東臯子始仕以醉懦罷鄉人或謂之東臯子不屑也退  
著無心子以見趣云

無心子萬居于越越王不知其大人也拘之仕無喜色  
泛若而從越國之載曰有穢行者不恥俄而無心子者  
以穢行聞於王王黜之無愠色退而將遊于蕩之野適



適動之色而遇機士機士撫髀而歎者三曰嘻子賢者  
而以罪廢無心子不應機士曰願受教無心子曰介聞  
蜚廉氏馬說乎昔者蜚廉氏有二馬一者朱鬣白毳龍  
體鳳臆驟馳如舞終日不釋鞍竟以藝死一者重脰昂  
尾馳頭頸貉腓踉蹌善蹶棄而散諸野終年肥遯是以  
鳳凰不憎山栖蛟龍不羞泥蟠君子不苟潔以羅患聖  
人不避穢而養生東臯子聞之曰善矣盡矣不可以加  
矣

負苓者傳

昔者文中子講道於白牛之溪弟子捧書北面環堂成  
列講罷程生薛生退省于松下語及周易薛收歎曰不  
及伏羲氏乎何詞之多也俄而有負苓者皤皤然委擔

而息曰吾子何歎也薛生曰叟何為者而徵吾歎負苓者曰夫麗朱者舟附墨者黑蓋累漸而得之也今吾子所服者道而猶有歎是六府五藏不能無受也吾是以問薛生曰收聞之師易者道之蘊也伏羲畫卦而文王繫之不逮省久矣以為文王病也吾是以疑負苓者曰文王焉知病伏羲氏病甚者也昔者伏羲氏之未畫卦也三才<sup>其</sup>不立乎四序其不行乎百物其不生乎萬象其不森乎何營營乎而費畫也自伏羲氏洩道之密漏神之機分張太和磔列元氣使天下之智詭道逆出曰我善言象而識物情陰陽相磨遠近相取作為剛柔同異之說以駭人志於是知者不知而大朴散矣則伏羲氏始兆亂者也安得羸歎而嗟文王負苓而行追而問之

居與姓名不答文中子聞之曰隱者也

仲長先生傳

先生諱子光字不曜自云洛陽人也往來河東傭人自給無室廬絕妻子開皇之末始結庵河渚以息身焉十餘年間以賣藥為業人莫之知也汾侯生以卜筮著名因遊河渚一論而服曰東方管輅不如也由是顯重守令至者皆親謁先生辭以瘡病未曾交語著獨遊頌及河渚先生傳以自喻識者有以知其懸解也人有請道則書老易二字示之彈琴餌藥以終其世文中子比之虞仲夷逸

五斗先生傳

有五斗先生者以酒德遊於人間人有以酒請者無貴

賤皆往往必取醉醉則不擇地斯寢矣醒則復起飲也  
常一飲五斗因以為號先生絕思慮寡言語不知天下  
之有仁義厚薄也忽然而去倏焉而來其動也天其靜  
也地故萬物不能縈心焉嘗言曰天下大可見矣生何  
為養而嵇康著論塗何為窮而阮籍慟哭故昏昏默默  
聖人之所居也遂行其志不知所如

### 醉鄉記

醉之鄉去中國不知其幾千里也其曠然無涯無丘陵  
阪險其氣和平一揆無晦明寒暑其俗大同無邑居聚  
落其人甚精無愛憎喜怒吸風飲露不食五穀其寢于  
乎其行徐徐與鳥獸魚鱉雜處不知有舟車器械之用  
昔者黃帝氏嘗獲遊其都歸而杳然喪其天下以為結

繩之政已薄矣降及堯舜作為千種百壺之獻固姑射  
神人以假道蓋至其邊鄙終身太平禹湯立法礼繁樂  
雜數十代與醉鄉隔其臣義和棄甲子而逃巢臻其鄉  
失路而道天故天下遂不寧至乎末孫桀紂怒而昇其  
糟丘階級千仞南面而望卒不見醉鄉成王得志于  
世乃命公且立酒人氏之職典司五齊拓土七千里僅  
與醉鄉達焉三十年刑措不用下逮幽厲迄乎秦漢中  
國喪遂與醉鄉絕而臣下之受道者往往竊至焉阮嗣  
宗陶淵明等數十人並遊于醉鄉沒身不返死葬其壤  
中國以為酒仙云嗟乎<sup>醉</sup>鄉氏之俗豈古華胥氏之國乎  
何其淳寂也如是績將遊焉故為之記

自作墓誌文并序

王績者有父母無朋友自為之字曰無功焉人或問之  
箕踞不對蓋以有道於已無功於時也不聽書曰達理  
不知榮辱不計利害起家以祿仕歷數職而進一階才  
高位下免責而已天子不知公卿不識四五十而無  
聞焉於是退歸以酒德遊於鄉里往往賣卜時時看書  
行若無所據鄉人未有達其意也常耕東臯號東臯子  
身死之日自為銘焉曰

有唐逸人太原王績若頑若愚似矯似激院止三徑堂  
唯四壁不知節制焉有親戚以生為附贅懸疣以死為  
決疣潰癰無思無慮何去何從壘頭刻石馬鬣裁封哀  
哀子<sub>孝</sub>子<sub>空</sub>對長松

登箕山祭巢許廟文

懷二子之高烈背嵩岳之來遊揖千載之遐軌登箕峰  
而少留昔時慷慨神輕九州今來寂絕魂離一丘英蹤  
落落而猶在精誠冥冥而遂休山荒廟僻地古松楸餘  
鄙懷之有素仰前哲之清猷同聲必感異代相求如至  
誠之見接庶輕蘋而可羞尚饗

祭閔龍逢文

歲月日謹以清酌之奠敬祭夏忠臣開生之靈日聖貴  
達節賢貴識時興亡有運用捨有期憑河暴虎前哲所  
嗤身滅主喪如何勿思我因行役歷子荒祠壯山河之  
舊壤歎墳隧之餘基松栢老草密苔滋託深悲於薄  
醑魂有靈而饗之

登龍門祭禹文

歲月日東臯子賤子王績謹以清酌之奠敬謁大禹夏  
王之靈曰百川既導三才即叙盛德安在靈威若存僕  
因行役偶觀遺廟帳望堂廡徘徊崇壑潦水降而黃河  
秋山光沉而白雲晚我之懷矣登臨慨然敢陳薄奠王  
其尚饗

祭處士仲長子光文

歲月日隣人王績謹以魚醒之奠敬祭仲長先生之靈  
曰明道若昧進退道若退鳥飛知還龍亢若悔嗟夫子  
理融其內不恆不求無憎無愛古人有言微妙玄通藏  
用以密養正以蒙嗟：夫子允執厥中不見其始孰知  
其終蕩：止足悠：默語周覽人事退居河渚何去何  
從誰弃誰與聊同聚散示均寒暑大矣夫子其生若浮



至矣夫子其死若休鄉黨不懼友朋不憂素琴猶在黃  
經若留老萊不昏梁鴻難偶筵無饋奠室無箕箒嗟二  
夫子豈圖其後金玉滿堂遺為之友

荊軻刺秦王

銜易水報秦皇精心貫日七首橫霜欲持兩問生禽一  
王惜哉智淺琴聲不防

項羽死烏江

項羽慷慨臨江問津馬贈亭長侯封故臣何為不渡自  
取亡身八千子弟今無一人

陳平分社肉

陳公主社割熟頒生心忘厚薄信若權衡風期有素父  
老無驚儻安天下還如此平

張良遇黃石公

張良授履老父欣然試期三夜留書一編為師有日報  
德何年穀城相遇期諸元泉

禹接蒼水使者

大哉夏禹投圖接神簡照青王繩光白銀山臨海上浦  
對江津繡衣使者誠為異人

伊尹負鼎見湯

成湯作伯伊尹來觀風雲有會激動何難調羹即獻負  
鼎相干任夫雖賤鳴條以安

太公釣渭濱

栖遲養老寂寞何為地接皇澗溪連灞池釣舟始泊漁  
竿半垂君王先兆還應見知

子推抱樹死

晉侯棄舊功臣永吟情隨地遠怨逐山深追兵斷谷列  
火焚林抱木而死誰明此心

蛇銜珠報隋侯

隋侯報德矜傷育鱗靈蛇感惠効力輸玆月華浮昉星  
光曜屑此猶知報而况吾人

君平賣卜

君平不仕賣卜窮年日裁數局常收百錢道實兼濟功  
非獨全用吾言者今過半焉

嵇康坐鍛

嵇康自逸手鍛為娛曲池四遶垂楊一株銅烟寒竈鐵  
焰分爐箕踞而坐何其然乎

蘭相如奪秦王璧

秦人市寶厥價從名蘭生詭說其心則貞清齊抱憤身  
睨兩楹卒全尺璧仍邀千城

霍光受武帝顧命

武皇大漸冲人未知霍光受命周公在期慷慨期託躬  
勤指揮昔時畫意君之所為

梁鴻孟光

孟光得揖梁鴻有妻琴書自逸丘壑同栖五噫絕賞雙  
眉獨齊續匡采具相將共携

老萊養親

老萊父母白首同歸欣欣爰養慊慊無違宛轉兒戲班  
爛綵衣篤哉孝思心精且微

甯戚扣牛角

甯生不遇商歌飯牛夜長難曉人生若浮寧唯石爛觀  
覩金流世無堯舜誰當見求

韓康賣藥

韓康賣藥道路銷聲口無二價心唯一平何圖女子盡  
識高名灞陵深入方知此情

朱雲折檻

朱雲獻直意在亡身願請神劍除君佞臣抗辭折檻輸  
忠犯鱗龍逢地下臣復何人

伯牙彈琴對鍾期

伯牙揮手奇聲絕倫鍾期妙聽是謂窮神綠馬仰秣丹  
魚聳鱗崇山流水知音幾人

王無功文集卷第五